

# Allakkat pillugit Inatsisartut peqqussutissaat

Pilersuineq, angallassineq, allakkerineq il.il. pillugit Kalaallit Nunaanni inatsimmi nr. 469-imi, 6. november 1985-imeersumi § 8 aamma § 13 naapertorlugit makku aalajangersarneqarput.

## Kapitali 1

### Atuuffiit

§ 1. POST Greenland TELE Greenland A/S-imut, POST Greenlandip ingerlannissaanik siunertaqarluni ingerlatseqatigiiffimmik pigisaminik pilersitsisinnaasumut ilaavoq.

*Imm.* 2. POST Greenlandip suliassarai:

- 1) Kalaallit Nunaanni allakkanik nassiussanillu inuiaqatigiit kalaallit pisariaqartitaannik isumaginnissalluni,
- 2) sullissinermik ingerlatsiviussalluni, sapinngisamik annertunerpaamik niuernermi tunngaviit atorlugit ingerlatsiviusoq, aamma
- 3) ingerlatsinermik inuiaqatigiit kalaallit ineriartornerannut naapertuuttunngorsaassalluni suliassanillu nutaanik allakkanik nassiussanillu suliassanut naleqquttunik tiguisassalluni.

## Kapitali 2

### POST Greenlandip ingerlatsinera

§ 2. POST Greenlandip allakkerinikkut kiffaartuussinert, § 3 malillugu ingerlateqquneqartut pillugit niuernermi piumasaqaatit nalinginnaasut aammalu suliffimmi atugassiaq najoqqutassiaq suliarissavai. Niuernermi piumasaqaatit ilaatigut tunisassianut kiffartuussinernullu ataasiakkaanut atasumik taarsiinissat aamma tunniussinermi malittarisassat allaaserineqarnerinik imaqassapput. Taarsiissutissat nalingi akiliinermut uppersaatini assigisaannilu POST Greenlandip nassiussanik tunniussinerniut atatillugu tunniussaani allasimasassapput.

*Imm.* 2. Peqqussutit imaluunniit aalajangiussat manna naapertorlugu malittarisassat imaluunniit aalajangiunneqartut POST Greenlandimit aalajangersarneqartut niuernermi piumasaqaatini takuneqarsinnaassapput. Tamannali atunngilaq POST Greenlandip § 5 naapertorlugu aalajangersagaani.

*Imm.* 3. Niuernermi piumasaqaatit nalinginnaasut kikkunnit tamanit takuneqarsinnaassapput.

*Imm.* 4. Niuernermi piumasaqaatini nalinginnaasuni annertuutigut allannguisoqarnissaa eqqarsaatigineqarpat, tamanna pillugu siumoortumik Naalakkersuisut ilisimatinneqassapput.

§ 3. POST Greenland pisussaavoq nuna tamakkerlugu allakkanik ingerlassinissaminut atatillugu nassiussinert makku qulakkiissallugit:

- 1) Allakkat qaatiguuliorneqarsimasut.
- 2) Aviisit ullormut, sapaatip akunneranut qaammammullu saqqummertartut kiisalu atuagassiat qaatiguuliorneqarsimasut.
- 3) Poortukkat qaatiguuliorneqarsimasut.

4) Tappiitsunut nassiussat qaatiguuliorneqarsimasut.

*Imm. 2.* POST Greenland aammattaaq pisussaaffiligaavoq nunap iluani aningaasat allakkerivikkut nassiussat allagartaat ingerlatissallugit.

*Imm. 3.* Nunap iluani allakkat qaatiguuliorneqarsimasut tammatsaalisatut imaluunniit nalinga nalunaarutigalugu ingerlanneqarsinnaassapput.

*Imm. 4.* Nunap iluani poortukkat qaatiguuliorneqarsimasut nalinga nalunaarutigalugu ingerlanneqarsinnaassapput.

*Imm. 5.* Nunat tamalaat akornanni isumaqatigiissutini allannguinerit ataqqillugit, Danmarkimut tassanngaanniillu, Savallimmiunut tassanngaanniilu nunanillu allaniit aammalu nuanut allanut nassiussanik qaatiguuliorneqarsimasunik ingerlassinissamut pisussaaffimmi allakkat, tappiitsunut nassiussat poortukkallu pineqarput.

**§ 4.** Ingerlassinissamut pisussaaffimmi, takuuk § 3, illoqarfimmut nunaqarfimmulluunniit qaninnermut nassiussanik tiguisarneq nassiussanillu assartuisarneq ilaatinneqarput. Allakkanik nalinginnaasunik ingerlassinissamut pisussaaffimmut aamma allakkanut nakkartitsisarfinni katersisarneq kiisalu agguaassisarneq ilaatinneqarput, taamaattorli takuuk imm. 2.

*Imm. 2.* Allakkat nalinginnaasut qanoq annertutigisumik agguaanneqartarnissaat pillugu malittarisassanik pingaarnernik Naalakkersuisut aalajangersaassapput.

**§ 5.** § 1, imm. 2 naapertorlugu nassiussinerit allat suut POST Greenlandimit isumagineqassanersut ingerlatseqatigiiffiup aalajangiiffigisinnaavai.

*Imm. 2.* Post Greenlandip suliassat allat suliarisinnaavai Post Greenlandip ingerlatsineranut pissusissamisoortumik ilanngunneqarsinnaasut..

**§ 6.** POST Greenland nioqqutissanik eqqussuinnermut annissuinnermullu Inatsisartut inatsisaat naapertorlugu maleruaqqusallu taakkununga atasut naapertorlugit nassiussanik nalunaarsuisussaavoq, aammalu eqqussuinnermi nakkutilliinnermut akitsuutinillu akileeqqusinernut peqataassalluni.

**§ 7.** Nunat tamalaat akornanni allakkerinnermut attuumassuteqartuni Post Danmark A/S-ip POST Greenland sinniisuuffigisinnaavaa.

*Imm. 2.* Allakkat il. il. nassiussat Kalaallit Nunaata Danmarkillu, Savallimmiullu nunallu akornanni Danmarki aqqusaarlugu imaluunniit toqqaannartumik ingerlanneqartartut pillugit peqqussut una inuiaqatigiit assigiinngitsut isumaqatigiissutaanni Danmarkemit akuersissutigineqarsimasuni Kalaallit Nunaata nunatut sumiinnera eqqarsaatiginagu aalajangersakkat malillugit saneqqunneqarsinnaavoq.

### **Kapitali 3**

#### *POST Greenlandip kisermaassisuunera*

**§ 8.** Allakkanik qaatiguuliorneqarsimasunik nunap iluani ingerlassinnermut POST Greenland kisermaassisuuvoq, taannalu imatut paasineqassaaq:

1) Imai apeqqutaatinngit nassiussinerit qaatiguuliorneqarsimasut, taakku allakkap puusnaanut assigisaanulluunniit poorneqarsimappata.

2) Allakkatigut nalunaarutit qaatiguuliorneqarsimasut, taakkununga ilaallutik postkortit, inunnut ataasiakkaanut tunngasunik imallit.

*Imm. 2.* Kisermaassisuunermut ilaanngillat katalogit, naqitat paasissutissiat, aviisit atuagassiallu nassiussallu allat assigiaartunik naqitanik imallit, akimut ersittumik poorneqarsimallutik qaatiguuliorneqarsimasut.

*Imm. 3.* Allakkanik Danmarkimit, Savalimmiunit nunallu allat sinnerinit nassitsisunit nassiunneqartunik, Kalaallit Nunaannut qaatiguuliorneqarsimasunik, Kalaallit Nunaanni sumiiffinnut ingerlassinissamut, aamma allakkanik qaatiguuliorneqarsimasunik nunanut allanut Kalaallit Nunaannit nassitsisunit Danmarkimut, Savalimmiunut nunallu allat sinnerinut qaatiguuliorneqarsimasunik nassiunneqartunik ingerlassinissamut POST Greenland kisermaassisuuvoq.

*Imm. 4.* Allakkanik qaatiguuliorneqarsimasunik ingerlassinermik kisermaassisuunermut taakkuninnga katersineq, assartuineq agguaassinerlu ilaatinneqarput.

**§ 9.** Kinaluunniit § 8-imi aalajangersakkat malinngikkaluarlugit inatsisinik unioqqutitsinani nassiusanik POST Greenland avaqqullugu isumaginnissinnaavoq, tamanna angallassinerruppat nammineq susassarisanik imaluunniit alla nassiusanik kiffartuutaq atorfeqarfigisaq sinnerlugu.

*Imm. 2.* Taamaaliortoqarsinnaavortaaq ingerlassineq pippat alla, ingerlassisup qaqutiguinnaq taamatorluinnaq ittumik ingerlassissuttagaa kiffartuullugu.

**§ 10.** Nassiusinerit ataasiakkaat tamarmik POST Greenlandip nassiusinermut pineqartumut akigititai naapertorlugit kalaallit frimærkiutaanik atuuttunik pilersorneqarsimappata, POST Greenland avaqqullugu inatsisit naapertorlugit ingerlanneqarsinnaapput, § 8-imi aalajangersakkat apeqqutaatinnagit.

*Imm. 2.* Frimærkit imm. 1 naapertorlugu atorneqartut atorunnaarsinneqassapput.

**§ 11.** Allakkat pillugit Nunarsuaq tamakkerlugu isumaqatigiisummi tamanna pillugu malittarisassiat naapertorlugit, POST Greenlandip nassiusat qaatiguuliorneqarsimasut Danmarkimit, Savalimmiunit nunallu allat sinnerinit Danmarkimi, Savalimmiuni imaluunniit nunat allat sinnerini inummit Kalaallit Nunaanni najugaqartumit, imaluunniit Kalaallit Nunaanni najugaqartoq alla sinnerlugu ingerlateqqinneqartussanngorlugit allakkerivimmut tunniunneqarsimasut, Kalaallit Nunaanni tiguisussanut ingerlatassanngortitat itigartitsissutigisinnaavai.

*Imm. 2.* Itigartitsinissamut piumasaqaatit pillugit malittarisassanik erseqqinnerusunik Naalakkersuisut aalajangersaasinnaapput.

**§ 12.** POST Greenlandip ilisarnaataa Naalakkersuisunit akuerineqarsimasooq Naalakkersuisut akuersiteqqaarnagit allanit atorneqaqqusaanngilaq.

**§ 13.** Aqqusinerni allaniluunniit kikkut tamarmik aqutigisinnaasaanni allakkanut nakkartitsisarfinnik inissinissamut POST Greenland kisermaassisuuvoq.

**§ 14.** POST Greenland frimærkinik saqqummersitsinissamut kisermaassisuuvoq, taannalu imatut paasineqassalluni; frimærkit POST Greenlandimit saqqummersinneqarsimassapput, POST Greenlandimiillu allakkerinikkut sullissinermut akigititanut akiliinermut atatillugit atorneqartussaallutik.

## Kapitali 4

### *Allakkerinermi isertuussisussaaneq allakkanillu ammaaneq*

**§ 15.** Kinaluunniit POST Greenlandimi sulisusoq, imaluunniit § 20 naapertorlugu ingerlatitseqqiinemik isumaginnittusoq susassaqaanngitsunut kikkunnuluunniit allat allakkerivimmik atuinerannut tunngasunik ilisimatitsisussaannngilaq periarfisseeqqusaaniluunniit taamatut paasissutissanik pissarsinissamut.

*Imm. 2.* Nipangiussisussaataaneq ataannassaaq pineqartoq POST Greenlandimi suliunnaarsimagaluarpalluunniit, imaluunniit § 20 naapertorlugu ingerlatitseqqittarneq unissimagaluarpalluunniit.

**§ 16.** Nassiusat qaatiguuliorneqarsimasut ingerlatassanngorlugit POST Greenlandimut tunniunneqartut, allakkanik tiguisussaq nassiusisimasorluunniit nassaarineqarsinnaatinnagu, eqqartuussivimmit

aalajangiinertaqanngitsumik POST Greenlandimit ammarneqarsinnaapput.

*Imm. 2.* Nassiussat innarlerneqarsimanerisa annertussusiat aalajangerniartillugu nassiussat qaatiguuliorneqarsimasut, POST Greenlandimut ingerlatassanngorlugit tunniunneqartut, aammattaaq eqqartuussivimmit aalajangiinertaqanngitsumik ammarneqarsinnaapput.

*Imm. 3.* Nassiussat piumasaqaatit suut tunngavigalugit ammarneqarsinnaaneri pillugit Naalakkersuisut malittarisassaliussapput.

## Kapitali 5

### *Ingerlassineq il.il.*

**§ 17.** Nassiussinerit qanoq ittuuneri aamma nassiussinerit ataasiakkaat killiligaaneri kiisalu nassiussassat allakkerivikkut ingerlatassanngorlugit tiguneqarnissaannut, aningaasallu allakkerivikkut nassiunneqarnerinut allagartanut piumasaqaatit pillugit POST Greenland malittarisassaliussaaq.

*Imm. 2.* POST Greenland aamma nassiussassap allakkerivikkut qanoq ilinikkut nassiunneqarsinnaannginnera pillugu malittarisassaliussaaq.

**§ 18.** POST Greenland qinnuigineqaruni poortukkat, nassiussat tammatsaaliukkat, nassiussat nalingi allassimasut aamma aningaasallu allakkerivikkoortitsinissamut akiliutigineqarsimasut tigunerinut uppersaammik tunisissaaq.

*Imm. 2.* Uppersaasaat allaffissiami POST Greenlandimit suliarineqarsimasumi imaluunniit akuerineqarsimasumi nassiussisumit immersorneqassaaq.

**§ 19.** Nassitsisup nassiussamut oqaasissaqarsinnaatitaanera pillugu maleruagassat erseqqinnerusut POST Greenlandip aalajangersassavai.

**§ 20.** Kalaallit Nunaani imaluunniit Kalaallit Nunaanniit Danmarkimut, Savalimmiunut nunalluunniit allat sinnerinut allakkanik ingerlatassanik angallassisussamik POST Greenland isumaqatigiissuteqarsinnaavoq.

*Imm. 2.* Pissutsit immikkut ittut peqqutaallutik pisariaqartinneqalerpat, POST Greenlandimiillu piumasaqartoqarneratigut, Kalaallit Nunaani imaluunniit Kalaallit Nunaanniit Danmarkimut, Savalimmiunut nunalluunniit allat sinnerinut aalajangersimasumik ingerlassisuusup, siumut utimullu aqqutigisamiittunit allakkerivinnit paarlaateqatigiiffinniluunniit nassiussassat ingerlannissaannut pissusaaffimmik ilaatinneqartut ilanngullugit tigusinissaa Naalakkersuisut aalajangersinnaavaat..

*Imm. 3.* Ingerlassineq pillugu Naalakkersuisut erseqqinnerusumik malittarisassaliorsinnaapput imm. 1 aamma 2-mi.

**§ 21.** Nassiussat tunniunneqarneri pillugit POST Greenland malittarisassaliussaaq.

**§ 22.** Illuni immikkoortuni illunilu uiguleriaani allakkanik nakkartitsisarfinnik kiisalu inissiaruarni allakkanik ikisisarfinnik ikkussuussinissaaq pillugu Naalakkersuisut malittarisassaliussapput.

*Imm. 2.* Inoqutigiit allakkanik ikisisarfiit pillugit malittarisassanik naammassinngitsut allakkanik agguassinerimi ilaatinngitsoortinneqarsinnaapput.

**§ 23.** Nassiussat apuunneqarsinnaanngitsut iliuseqarfigisarnissaat nassiussinernilu tigusassat apuunneqarsinnaanngitsut pillugit POST Greenland malittarisassaliussaaq.

*Imm. 2.* Nassiussat nioqqutissanik eqqunneqaqqusaanngitsunik imaqtartut imaluunniit imaqarsorineqartut, tamakkununga ilanngullugit nioqqutissat akileraarusigassat kukkunikkut akileraaruserneqarsimanngitsut, POST Greenlandimiit sumiiffimmi oqartussanut eqqortunut tunniunneqassapput.

§ 24. Immersugassat frimærkinik allakkap isumagineqarnerani nipititsivigineqarsimasut POST Greenlandip pigisarai.

## Kapitali 6

*POST Greenlandip sullissinerata akilerneqartarnera*

### *Akiliutit*

§ 25. Akiliutit POST Greenlandimit aalajangersarneqassapput kikkunnillu tamanit takuneqarsinnaassallutik.

*Imm. 2.* Poortukkanut, allakkanut aviisinut ullormut, sapaatip akunneranut qaammammullu saqqummersartunut kiisalu atuagassianut Kalaallit Nunaata iluani aamma Danmarkimut Savalimmiunullu nassiussanut akiliutit annertussusissaat Naalakkersuisunit akuersissutigineqassapput.

*Imm. 3.* Tappiitsunut nassiussat nunap iluani akeqanngitsumik nassiunneqartassapput.

§ 26. Akiliutissat naatsorsorneqartarnerannut frimærkileeriaatsinut kiisalu nassiussanut akiliutissat akileraarutissallu akilerneqartarnerannut tunngasut POST Greenlandip aalajangersassavai.

§ 27. Niuertarfinnit frimærkinik tuniniaaneq pillugu POST Greenland ilumini malittarisassanik aalajangersaassaaq.

## Kapitali 7

*Taarsiissuteqartarneq*

§ 28. Aningaasanik allakkerivikkut nassiussinermut aamma ingerlassisussaataanermt ilaasunik nassiussanik, § 3-mi ingerlassisussaataanermt pisussaaffimmi ilaasunik kinguartoornermt atasunik POST Greenland taarsiineq ajorpoq.

*Imm. 2.* Nassiussanut, ingerlassisussaataanermt ilaasunut tammartunut innarlerneqartunullu piffissami nassiussap tiguneqarneraniit tunniunneqarneranut POST Greenland taarsiissuteqartarpoq, taamaattoq takukkit imm. 3, § 29, imm. 1, § 32, aamma § 35, imm. 2.

*Imm. 3.* Tammartut innarlerneqarsimasulluunniit nassiussisup tungaaniit kukkunermt sumiginnaanermilluunniit peqquteqarpata, nassiussap qanoq issusia, poortorneqannginnera imaluunniit amigartumik poortorneqarsimanera, imaluunniit pissutsit POST Greenlandip avaqqussinnaasimanngisai kingunerilu POST Greenlandip pinngitsoortissinnaanngisai POST Greenlandimit taarsiissuteqarfigineqarneq ajorput.

*Nunap iluani nassiussat*

§ 29. Allakkanut nalinginnaasunut tammartunut innarlerneqarsimasunullu POST Greenland taarsiineq ajorpoq. Aamma taamaappoq imarisai tamakkiisumik ilaannakuusumilluunniit annaaneqarsimappata.

*Imm. 2.* Poortukkat nalinginnaasut tammartut innarlerneqarsimasulluunniit, imaluunniit imarisai tamakkiisumik ilaannakuusumilluunniit annaaneqarsimasut, POST Greenlandip annerpaamik aningaasaliiffissatut aalajangersagaata iluani taarsiiffigineqassapput.

§ 30. Allakkat ataatsit poortugarluunniit nalinga nalunaarlugu nassiunneqartoq tammarpat innarlerneqarpalluunniit, imarisaaluunniit tamakkiisumik ilaannakuusumilluunniit annaaneqarpat, annerpaamik naligitinneqartutut nalunaarutigineqartoq tunngavigalugu innarlerneqartoq taarserneqassaaq.

**§ 31.** Allakkat tammatsoaliukkat tammarpata, POST Greenlandip aalajangersagaa naapertorlugu nassiussisoq taarsiiffigineqassaaq.

*Imm. 2.* Allakkat tammatsoaliukkat innarlerneqarsimappata, imarisaaluunniit tamakkiisumik ilaannakuusumilluunniit annaaneqarsimappata, POST Greenlandip annerpaamik aningaasaliiffissatut aalajangersagaata iluani innarlerneqartoq taarsiiffigineqassaaq.

**§ 32.** Aviisinut ullormut, sapaatip akunneranut qaammammullu saqqummertartunut kiisalu atuagassianut tammartunut innarlerneqartunulluunniit POST Greenland taarsiineq ajorpoq.

*Danmarkimut Savalimmiunullu siumut utimullu aammalu nunat allat sinnerinut taakkunanngaanniillu nassiussat*

**§ 33.** Danmarkimut, Savalimmiunut nunallu allat sinnerinut siumut utimullu allakkerivikkut nassiussanut Nunarsuaq tamakkerlugu allakkat pillugit isumaqatigiissummi malittarisassat naapertorlugit taarsiisoqartassaaq.

*Imm. 2.* Kalaallit Nunaanniit Danmarkimut Savaliummiunut nunanullu allat sinnerinulluunniit nassiussaq tammarpat innarlerneqarpalluunniit, imarisaaluunniit tamakkiisumik ilaannakuusumilluunniit annaaneqarsimappat piffissami ingerlassinermi POST Greenlandimit isumagineqartillugu, nunap iluani nassiusinerit assigalugit taarsiisoqassaaq, nassiussisumut tamanna iluaqutaanerussappat.

*Imm. 3.* Danmarkimiit, Savalimmiuniit nunallu allat sinneriniilluunniit nassiussaq innarlerneqarpata piffissami ingerlassinermi POST Greenlandimit isumagineqartillugu, nunap iluani nassiusinerit assigalugit taarsiisoqassaaq, nassiussisumut tamanna iluaqutaanerussappat.

*Aningaasat allakkerivikkut nassiussat allagartaat*

**§ 34.** Post Greenland aningaasanut aningaasat nassiussat allagartaat atorlugu nassiussassatut tunniunneqarsimasunut inussaannut eqqortumik tunniunneqarnissaasa tungaanut akisussaavoq, nassitsisoq tigusisussarluunniit kukkusimanngippata imaluunniit erseqqinngitsumik paasissutissiisimappata, taamaattorli takuuk § 28, imm. 1 aamma § 35, imm. 2.

*Taarsiissuteqarnerup annertussusaa*

**§ 35.** Taarsiissutigineqarsinnaapput taamaallaat tammartup nalinga imaluunniit nassiussap ajoquserneqarnermigut nalikillissutigisimasaa. Taarsiissutissat naatsorsorneqarneranni ajoqusiinerup nalaani pissusiusut tunngavigineqassapput.

*Imm. 2.* Taarsiisoqassanngilaq iluaqutigisartakkanik iluaqutigisartagaqarunnaarnermut, aningaasat nalikillinerisigut, aningaasanut annaasanut imaluunniit ajoqusiinerup kingunerisaanut allatigut sunniuttartunut allanut.

*Imm. 3.* Nassiussaq tammarpat taarsiissuteqarnerup saniatigut nassiussap allakkerivikkoortumik isumagineqarneranut akiliut taarsiissutigineqassaaq. Tamannattaaq atuuppoq nassiussaq ajoquserneqarsimappat imaluunniit taassuma imarisai tamarmik imaluunniit imarisaasa ilaat tammarsimappata, tamannalu pissutaasimappat nassiussap utertinneqartariaqarneranut.

*Taarsiiffigitissinnaatitaaneq*

**§ 36.** Nassiussanut aningaasanullu tammartunut, aamma nassiussap allakkerivikkoortumik isumagineqarneranut akiliutip utertinneqarnissaa ilanngullugu, POST Greenland taamaallaat

taarsiisussaavoq, uppersarsarneqarsinnaappat nassiussat POST Greenlandimut tunniunneqarsimasut, imaluunniit aningaasat POST Greenlandimut akilernerqarsimasut.

**§ 37.** POST Greenlandip taarsiisussaataitanera atorunnaassaaq, nassiussap tunniunneqarneraniit imaluunniit aningaasat allakkerivikkut nassiunneqartussatut akilernerqarneranniit ukioq ataaseq qaangiutsinnagu piumasaqaat POST Greenlandimut nalunaarutigineqarsimangippat.

**§ 38.** Taarsiineq atorunnaarsitsinermik kinguneqartumik nassiussimut tunniunneqarsinnaavoq. Nassiussaq tiguisussamit tiguneqarsimappat, taarsiineq atorunnaarsitsinermik kinguneqartumik tassunga tunniunneqassaaq.

#### *Immikkut itummik pisoqartillugu taarsiisuteqartarneq*

**§ 39.** POST Greenland qaqutigut immikkut ittuni ataasiakkaani taarsiisarsinnaavoq taarsiisuteqarnermut malittarisassat nalinginnaasut naapertorlugit POST Greenland taarsiisinnaavoq, taamaaliortassaarlu ajoqusiineq pissutsinik ima immikkut illuinnartigisunik pissuteqarsimappat POST Greenlandip taarsiisuteqartussaananerani kapitalimi uani aalajangersakkanik atuinissaq naapertuutinningsutut pissuteqartussatut isumaqarfiginassalluni.

### **Kapitali 8**

#### *Maalaarutit*

**§ 40.** POST Greenlandip aalajangiineri Naalakkersuisunut maalaarutigineqarsinnaapput, taamaattoq takuuk imm. 2.

*Imm. 2.* § 39 naapertorlugu aalajangiinerit Naalakkersuisunut maalaarutigineqarsinnaangillat.

*Imm. 3.* Maalaarutitik tunniussinissamut piffissarititaasoq aalajangiinerup maalaarutigineqartup tighneraniit sapaatit akunnerinik sisamanik sivisussuseqarpoq.

### **Kapitali 9**

#### *Inatsisartut peqqussutaannik unioqutitsineq*

**§ 41.** § 8, imm. 1, 3 aamma 4, §§ 12, 13, 14 aamma 15-imik unioqutitsinerit Kalaallit Nunaanni pinerluttulerinermut inatsisit malillugit akiliisitsinermik kinguneqarsinnaapput.

**§ 42.** Maleruqqusani peqqussut manna naapertorlugu Naalakkersuisunit atortuulersinneqartuni maleruqqusani unioqutitsinermut akiliisitsisarneq pillugu maleruagassat aalajangersarneqarsinnaapput.

**§ 43.** Ingerlatseqatigiiffik, anpartsselskabi, piginneqatigiiffik assigisaalluunniit unioqutitsippata, selskabi taamaalluni akiliisitaanermut akisussaatinneqarsinnaavoq. Unioqutitsineq Namminersornerullutik Oqartussanit, kommunimit imaluunniit kommunit suleqatigiiffiannit, kommunalbestyrelsit nunaqarfinnilu aqutsisut il.il. pillugit Inatsisartut inatsisaanni § 64-imi ilaatinneqartumit piliaasimappat, Namminersornerullutik Oqartussat, kommunalbestyrelsi imaluunniit kommunit suleqatigiiffiat akiliinissamut akisussaatinneqarsinnaapput.

### **Kapitali 10**

#### *Atortuulersitsinermik aalajangersagaq*

**§ 44.** Inatsisartut peqqussutaat atortuulissaaq januaarip aallaqqaataani 2005-imi.

*Imm. 2.* Tamatunnga peqatigitillugu Kalaallit Allakkeriviat pillugu Inatsisartut peqqussutaat nr. 15 30.

oktober 1992-imeersoq aammalu Kalaallit Allakkeriviat pillugu Inatsisartut peqqussutaata nr. 7, 6. juni 1997-imeersup allannguutaa atorunnaarsinneqarput.

*Namminersornerullutik Oqartussat, ulloq 14. november 2004*

Hans Enoksen

/

Jens Napātôk'

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut